

隋書卷七十六

唐

特

進

臣

魏

徵

上

列傳第四十一

文學

易曰觀乎天文以察時變觀乎人文以化成天下傳曰書身之文也言而不文行之不遠故堯曰則天表文明之稱周云盛德著煥乎之美然則文之爲用其大矣哉上所以敷德教於下下所以達情志於上天則經緯天地作訓垂範次則風謠歌頌匡主和民或離譴放逐之臣塗窮後門之士道輒軻而未遇志鬱抑而不申憤激委約之中飛文魏闕之下奮迅泥滓自致青雲振沈瀾於一朝流風聲於千載往往而有是以凡百君子莫不用心焉自漢魏以來迄乎晉宋其體屢變前哲論之詳矣暨永明天監之際太天和保之間洛陽江左文雅尤盛于時作者濟陽江淹吳郡沈約樂安任昉濟陰溫子昇河間邢子才鉅鹿魏伯起等並學窮書圃思極人文縟綵鬱於雲霞逸響振於金石英華秀發波瀾浩蕩筆有餘力詞無竭源方諸張蔡曹王亦各一時之選也聞其風者聲馳景慕然彼此好尚互有異同江左宮商發越貴於清綺河朔詞義貞剛重乎氣質氣質則理勝其詞清綺則文過其意理深者便於時用文華者宜於詠歌此其

南北詞人得失之大較也若能掇彼清音簡茲累句各去所短合其兩長則文質斌斌盡善盡美矣梁自大同之後雅道淪缺漸乖典則爭馳新巧簡文湘東啟其淫放徐陵庾信分路揚鑣其意淺而繁其文匿而彩詞尙輕險情多哀思格以延陵之聽蓋亦亡國之音乎周氏吞併梁荆此風扇於關右狂簡斐然成俗流宕忘反無所取裁高祖初統萬機每念斲彫爲樸發號施令咸去浮華然時俗詞藻猶多淫麗故憲臺執法屢飛霜簡煬帝初習藝文有非輕側之論暨乎卽位一變其風其與越公書建東都詔冬至受朝詩及擬飲馬長城窟並存雅體歸於典制雖意在驕淫而詞無浮蕩故當時綴文之士遂得依而取正焉所謂能言者未必能行蓋亦君子不以廢人言也爰自東帝歸秦逮乎青蓋入洛四隩咸臬九州攸同江漢英靈燕趙奇俊並該天網之中俱爲大國之寶言刈其楚片善無遺潤木圓流不能十數才之難也不其然乎時之文人見稱當世則范陽盧思道安平李德林河東薛道衡趙郡李元操鉅鹿魏澹會稽虞世基河東柳謩高陽許善心等或鷹揚河朔或獨步漢南俱騁龍光並驅雲路各有本傳論而敘之其潘徽萬壽之徒或學優而不切或才高而無貴仕其位可得而卑其名不可堙沒今總之於此爲文學傳云

劉臻

劉臻字宣擊浦國相人也父顯梁尋陽太守臻年十八舉秀才爲邵陵王東閣祭酒元帝時遷中書舍人

江陵陷沒復歸蕭譽以爲中書侍郎周家宰宇文護辟爲中外府記室軍書羽檄多成其手後爲露門學士授大都督封饒陽縣子歷藍田令畿伯下大夫高祖受禪進位儀同三司左僕射高嶺之伐陳也以臻隨軍典文翰進爵爲伯皇太子勇引爲學士甚褻狎之臻無吏幹又性恍惚耽悅經史終日覃思至於世事多所遺忘有劉訥者亦任儀同俱爲太子學士情好甚密臻住城南訥住城東臻嘗欲尋訥謂從者曰汝知劉儀同家乎從者不知尋訥謂臻還家荅曰知於是引之而去旣扣門臻尙未悟謂至訥家乃據案大呼曰劉儀同可出矣其子迎門臻驚曰此汝亦來耶其子荅曰此是大人家於是顧盼久之乃悟叱從者曰汝大無意吾欲造劉訥耳性好噉蜺以音同父諱呼爲扁螺其疎放多此類也精於兩漢書時人稱爲漢聖開皇十八年卒年七十二有集十卷行於世

王頰

王頰字景文齊州刺史頰之弟也年數歲值江陵陷隨諸兄入關少好遊俠年二十尙不知書爲其兄顯所責怒於是感激始讀孝經論語晝夜不倦遂讀左傳禮易詩書乃歎曰書無不可讀者勤學累載遂遍通五經究其旨趣大爲儒者所稱解綴文善談論年二十二周武帝引爲露門學士每有議決多頰所爲而頰性識甄明精力不倦好讀諸子偏記異書當代稱爲博物又曉兵法益有縱橫之志每歎不逢時常

以將相自許開皇五年授著作佐郎尋令於國子講授會高祖親臨釋奠國子祭酒元善講孝經頰與相
論難詞義鋒起善往往見屈高祖大奇之起授國子博士後坐事解職配防嶺南數載授漢王諒府諮議
參軍王甚禮之時諒見房陵及秦蜀二王相次廢黜潛有異志頰遂陰勸諒繕治兵甲及高祖崩諒遂舉
兵反多頰之計也頰後數進奇策諒不能用楊素至蒿澤將戰頰謂其子曰氣候殊不佳兵必敗汝可隨
從我既而兵敗頰將歸突厥至山中徑路斷絕知必不免謂其子曰吾之計數不減楊素但坐言不見從
遂至於此不能坐受擒執以成豎子名也吾死之後汝慎勿過親故於是自殺瘞之石窟中其子數日不
得食遂過其故人竟爲所擒楊素求頰屍得之斬首梟於太原時年五十四撰五經大義三十卷有集十
卷並因兵亂無復存者

崔儵

崔儵字岐叔清河武城人也祖休魏青州刺史父仲文齊高陽太守世爲著姓儵年十六太守請爲功曹
不就少與范陽盧思道隴西辛德源同志友善每以讀書爲務負恃才地忽略世人大署其戶曰不讀五
千卷書者無得入此室數年之間遂博覽羣言多所通涉解屬文在齊舉秀才爲員外散騎侍郎遷殿中
侍御史尋與熊安生馬敬德等議五禮兼脩律令尋兼散騎侍郎聘于陳使還待詔文林館歷殿中膳部

員外三曹郎中儻與頓丘李若俱見稱重時人爲之語曰京師灼灼崔儻李若齊亡歸鄉里仕郡爲功曹州補主簿開皇四年徵授給事郎尋兼內史舍人後數年兼通直散騎侍郎聘于陳還授員外散騎侍郎越國公楊素時方貴倖重儻門地爲子玄縱娶其女爲妻聘禮甚厚親迎之始公卿滿座素令騎迎儻故敝其衣冠騎驢而至素推令上座儻有輕素之色禮甚偪言又不遜素忿然拂衣而起竟罷座後數日儻方來謝素待之如初仁壽中卒於京師時年七十二子世濟

諸葛穎

諸葛穎字漢丹陽建康人也祖銓梁零陵太守父規義陽太守穎年八歲能屬文起家梁邵陵王參軍事轉記室侯景之亂奔齊待詔文林館歷大學博士太子舍人周武平齊不得調杜門不出者十餘年習周易圖緯倉雅莊子頗得其要清辯有俊才晉王廣素聞其名引爲參軍事轉記室及王爲太子除藏獮監煬帝卽位遷著作郎甚見親倖出入臥內帝每賜之曲宴輒與皇后嬪御連席共榻穎因間隙多所譖毀是以時人爲之治葛後錄恩舊授朝請大夫帝常贈穎詩其卒章曰參翰長洲苑侍講肅成門名理窮研聚英華恣討論實錄資平允傳芳導後昆其見待遇如此從征吐谷渾加正議大夫後從駕北巡卒於道年七十七穎性褊急與柳謦每相忿鬪帝屢責怒之而猶不止於後帝亦薄之有集二十卷撰鑿駕北巡

記三卷幸江都道里記一卷洛陽古今記一卷馬名錄二卷並行於世有子嘉會

孫萬壽

孫萬壽字仙期信都武強人也祖寶魏散騎常侍父靈暉齊國子博士萬壽年十四就阜城熊安生受五經略通大義兼博涉子史善屬文美談笑博陵李德林見而奇之在齊年十七奉朝請高祖受禪滕穆王引爲文學坐衣冠不整配防江南行軍總管宇文述召典軍書萬壽本自書生從容文雅一旦從軍鬱鬱不得志爲五言詩贈京邑知友曰賈誼長沙國屈平湘水濱江南瘴癘地從來多逐臣嗟余非巧宦少小拙謀身欲飛無假翼思鳴不值晨如何載筆士翻作負戈人飄飄如木偶棄置同芻狗失路乃西浮非狂一東走晚歲出函關方春度京口石城臨獸據天津望牛斗牛斗盛妖氛梟獍已成羣都超初入幕王粲始從軍裹糧楚山際被甲吳江濱吳江一浩蕩楚山何糾紛驚波上濺日喬木下臨雲繫越恆資辯喻蜀幾飛文魯連唯救患吾彥不爭勳羈遊歲月久歸思常搔首非關不樹萱豈爲無杯酒數載辭鄉縣三秋別親友壯志後風雲衰鬢先蒲柳心緒亂如絲空懷疇昔時昔時遊帝里弱歲逢知己旅食南館中飛蓋西園裏河間本好書東平唯愛士英辯接天人清言洞名理鳳池時寓直麟閣常遊止勝地盛賓僚麗景相攜招舟汎昆明水騎指渭津橋祓除臨灞岸供帳出東郊宜城醢始熟陽翟曲新調繞樹烏啼夜離羣

雉飛朝細塵梁下落長袖寧中嬌懽娛三樂至懷抱百憂銷夢想猶如昨尋思久寂寥一朝牽世網萬里
逐波潮迴輪常自轉懸旆不堪搖登高視矜帶鄉關白雲外迴首望孤城愁人益不平華亭屑鶴唳幽谷
早鶯鳴斷絕心難續恹恹魂驚羣紀邇家好鄒魯故鄉情若值南飛鴈時能訪死生此詩至京盛爲當
時之所吟誦天下好事者多書壁而翫之後歸鄉里十餘年不得調仁壽初徵拜豫章王長史非其好也
王轉封于齊卽爲齊王文學當時諸王官屬多被夷滅由是憚不自安因謝病免久之授大理司直卒於
官時年五十二有集十卷行於世

王貞

王貞字孝逸梁郡陳留人也少聰敏七歲好學善毛詩禮記左氏傳周易諸子百家無不畢覽善屬文詞
不治產業每以諷讀爲娛開皇初汴州刺史樊叔略引爲主簿後舉秀才授縣尉非其好也謝病于家煬
帝卽位齊王暕鎮江都聞其名以書召之曰夫山藏美玉光照廊廡之間地蘊神劍氣浮星漢之表是知
毛遂穎脫義感平原孫慧文詞來遷東海顧循寡薄有懷髦彥籍甚清風爲日久矣未獲披覲良深佇遲
比高天流火早應涼颼陵雲仙掌方承清露想攝衛攸宜與時休適前園後圃從容丘壑之情左琴右書
蕭散煙霞之外茂陵謝病非無封禪之文彭澤遺榮先有歸來之作優游儒雅何樂如之余屬當藩屏宣

條楊越坐堂聽訟事絕詠歌攀桂摘詞眷言高邁至於揚旌北渚飛蓋西園託乘之應劉置醴闕申穆胥
淮之賓徒聞其語趨燕之客罕值其人卿道冠鷹揚聲高鳳舉儒墨泉海詞章苑囿棲遲衡泌懷寶迷邦
徇茲獨善良以於邑今遣行人具宣往意側望起予甚於飢渴想便輕舉副此虛心無信投石之談空慕
鑿坏之逸書不盡言更慙詞費及貞至王以客禮待之朝夕遣問安不又素文集貞啟謝曰屬賀德仁宣
教須少來所有拙文昔公旦之才藝能事鬼神夫子之文章性與天道雅志傳於游夏餘波鼓於屈宋雕
龍之迹具在風騷而前賢後聖代相師祖賞逐時移出門分路變清音於正始體高致於元康咸言坐握
蛇珠誰許獨爲麟角孝逸生於戰爭之季長於風塵之世學無半古才不逮人往屬休明寸陰已昃雖居
可封之屋每懷貧賤之恥適鄆郢而迷塗入邯鄲而失步歸來反覆心灰遂寒豈謂橫議過實虛塵容覽
枉高車以載懸寶明珠以彈雀遂得裏糧三月重高門之餘地背淮千里望章臺之後塵與懸黎而並肆
將駿驥而同皂終朝擊缶匪黃鍾之所諧日暮却行何前人之能及顧想平生觸塗多感但以積年沈痼
遺忘日久拙思所存纔成三十三卷仰而不至方見學仙之遠窺而不覩始知游聖之難咫尺天人周章
不暇怖甚真龍之降慙過白豕之歸伏紙陳情形神悚越齊王覽所上集善之賜良馬四匹貞復上江都
賦王賜錢十萬買馬二匹未幾以疾甚還鄉里終于家

虞綽 字大德

虞綽字士裕會稽餘姚人也父孝曾陳始興王諮議綽身長八尺姿儀甚偉博學有俊才尤工草隸陳左衛將軍傅縡有盛名於世見綽詞賦歎謂人曰虞郎之文無以尚也仕陳爲太學博士遷永陽王記室及陳亡晉王廣引爲學士大業初轉爲祕書學士奉詔與祕書郎虞世南著作佐郎庾自直等撰長洲玉鏡等書十餘部綽所筆削帝未嘗不稱善而官竟不遷初爲校書郎以藩邸左右加宣惠尉遷著作佐郎與虞世南庾自直蔡允恭等四人常居禁中以文翰侍詔恩盼隆洽從征遼東帝會臨海頓見大鳥異之詔綽爲銘其辭曰維大業八年歲在壬申夏四月景子皇帝底定遼碣班師振旅龍駕南轅鸞旗西邁行宮次于柳城縣之臨海頓焉山川秀實仙都也旗門外設款跨重阜帳殿周施降望大壑曄清蹕下輕輿警百靈綏萬福踐素沙步碧沚同軒皇之襄野邁漢宗於河上想汾射以開襟望蓬瀛而載伫竇然齊肅藐屬殊庭兼以聖德遐宣思別風興淮雨休符潛感表重瀾於夷波璧日曬光卿雲舒采六合開朗十洲澄鏡少選之間儵焉靈感忽有祥禽皎同鶴鷺出自霄漢翻然雙下高逾一丈長乃盈尋靡霜暉於羽翮激丹華於背距鸞翔鳳峙鵠起鴻鸞或蹶或啄載飛載止徘徊馴擾咫尺乘輿不藉揮琴非因拊石樂我君德是用來儀斯固類仙人之騏驎冠羽族之宗長西王青鳥東海赤鴈豈可同年而語哉竊以銘基華

岳事乖靈異紀迹鄒山義非盡美猶方冊不泯遺文可觀況盛德成功若斯懿鑠懷真味道加此感通不
鐫名山安用銘異臣拜稽首敢勒銘云來蘇興怨帝自東征言復禹績乃御軒營六師薄伐三韓肅清興
行天罰赫赫明明文德上暢靈武外薄車徒不擾苛虐靡作凱歌載路成功允鑠反旆還軒遵林並壘停
輿海澨駐蹕巖陲宵想遐凝藐屬千里金臺銀闕雲浮岳峙有感斯應靈禽效祉飛來清漢俱集華泉好
音玉響皓質冰鮮狎仁馴德習習翩翩絕迹無泯於萬斯年帝覽而善之命有司勒於海上以度遼功授
建節尉綽恃才任氣無所降下著作郎諸葛穎以學業倖於帝綽每輕侮之由是有隙帝嘗問綽於穎
曰虞綽竊人也帝頷之時禮部尙書楊玄感稱爲貴倨虛襟禮之與結布衣之友綽數從之遊其族人虞
世南誠之曰上性猜忌而君過厚玄感若與絕交者帝知君改悔可以無咎不然終當見禍綽不從尋有
告綽以禁內兵書借玄感帝甚銜之及玄感敗後籍沒其家妓妾並入宮帝因問之玄感平常時與何人
交往其妾以虞綽對帝令大理卿鄭善果窮治其事綽曰羈旅薄遊與玄感文酒談款實無他謀帝怒不
解從綽且末綽至長安而亡吏逮之急於是潛度江變姓名自稱吳章遊東陽抵信安令天水辛大德大
德會之歲餘綽與人爭田相訟有識綽者而告竟爲吏所執坐斬江都時年五十四所有詞賦並行於世
大德爲令誅翦羣盜甚得民和與綽俱爲使者所執其妻泣曰每諫君無匿學士今日之事豈不哀哉大

德笑曰我本圖脫長者反爲人告之吾罪也當死以謝綽會有詔死罪得以擊賊自効信安吏民詣使者叩頭曰辛君人命所懸辛君若去亦無信安矣使者留之以討賊帝怒斬使者大德獲全

王冑

王冑字承基琅琊臨沂人也祖筠梁太子詹事父祥陳黃門侍郎冑少有逸才仕陳起家鄱陽王法曹參軍歷太子舍人東陽王文學及陳滅晉王勰引爲學士仁壽末從劉方擊林邑以功授卽都督大業初爲著作佐郎以文詞爲煬帝所重帝常自東都還京師賜天下大酺因爲五言詩詔冑和之其詞曰河洛稱朝市嶠函實輿區周營曲阜作漢建奉春謨大君苞二代皇居盛兩都招搖正東指天駟迺西驅展輪齊玉軼式道耀金吾千門駐罕畢四達儼車徒是節春之暮神臯華實敷皇情感時物睿思屬粉榆詔問百年老恩隆五日酺小人荷銘鑄何由荅大鑪帝覽而善之因謂侍臣曰氣高致遠歸之於冑詞清體潤其在世基意密理新推庾自直過此者未可以言詩也帝所有篇什多令繼和與虞綽齊名同志友善于時後進之士咸以二人爲準的從征遼東進授朝散大夫冑性疎率不倫自恃才大鬱鬱於薄宦每負氣陵傲忽略時人爲諸葛穎所嫉屢譖之於帝帝愛其才而不罪禮部尙書楊玄感虛襟與交數遊其第及玄感敗與虞綽俱徙邊冑遂亡匿潛還江左爲吏所捕坐誅時年五十六所著詞賦多行於世冑兄胄字元

恭博學多通少有盛名於江左仕陳歷太子洗馬中舍人陳亡與賁俱爲學士煬帝卽位授祕書郎卒官
庾自直

庾自直潁川人也父持陳羽林監自直少好學沉靜寡欲仕陳歷豫章王府外兵參軍宣惠記室陳亡入
關不得調晉王廣聞之引爲學士大業初授著作佐郎自直解屬文於五言詩尤善性恭慎不妄交遊特
爲帝所愛帝有篇章必先示自直令其誡訶自直所難帝輒改之或至於再三俟其稱善然後方出其見
親禮如此後以本官知起居舍人事化及作逆以之北上自載露車中感激發病卒有文集十卷行於世

潘徽

潘徽字伯彥吳郡人也性聰敏少受禮於鄭灼授毛詩於施公受書於張冲講莊老於張譏並通大義尤
精三史善屬文能持論陳尙書令江總引致文儒之士徽一詣總總甚敬之釋褐新蔡王國侍郎選爲客
館令隋遣魏澹聘于陳陳人使徽接對之澹將反命爲敢於陳主曰敬奉弘慈曲垂餞送徽以爲伏奉爲
重敬奉爲輕却其敢而不奉澹立議曰曲禮注曰禮主於敬詩曰維桑與梓必恭敬止孝經曰宗廟致敬
又云不敬其親謂之悖禮孔子敬天之怒成湯聖敬日躋宗廟極重上天極高父極尊君極貴四者咸同
一敬五經未有異文不知以敬爲輕竟何所據徽難之曰向所論敬字本不全以爲輕但施用處殊義成

通別禮主於敬此是通言猶如男子冠而字之注云成人敬其名也春秋有冀缺夫妻亦云相敬既於子則有敬名之義在夫亦有敬妻之說此可復並謂極重乎至若謝諸公固非尊地公子敬愛止施賓友敬問敬報彌見雷同敬聽敬酬何關貴隔當知敬之爲義雖是不輕但敬之於語則有時混漫今云敬奉所以成疑聊舉一隅未爲深據澹不能對遂從而改焉及陳滅爲州博士奉孝王俊聞其名召爲學士嘗從俊朝京師在塗令徽於馬上爲賦行一驛而成名曰述思賦俊覽而善之復令爲萬字文并遺撰集字書名爲韻纂徽爲序曰文字之來尙矣初則義皇出震觀象緯以法天次則史頡佐軒察蹄迹而取地於是八卦爰始爻文斯作繩用旣息墳籍生焉至如龍筌授河龜威出洛綠綈白檢述勛華之運金繩玉字表殷夏之符卸甲示於姬壇吐卷徵於孔室莫不理包遠邇迹會幽明仰協神功俯照人事其制作也如彼其祥瑞也如此故能宣流萬代正名百物爲生民之耳目作後王之模範頌美形容垂芬篆素暨大隋之受命也追蹤三五並曜參辰外振武功內修文德飛英聲而勒嵩岱彰大定而銘鍾鼎春千秋羽盛禮樂於膠庠省俗觀風採歌謠於唐衛我秦王殿下降靈霄極稟秀天機質潤珪璋文兼黼黻楚詩早習頗屬懷於言志沛易先通每留神於索隱尊儒好古三雍之對已邁博物多能百家之工爛洽遨遊必名教淵獵唯圖史加以降情引汲擇善獨微築館招賢攀枝伋異剖連城於并里賣束帛於巨國薄技無遺片言

便賞所以人加脂粉物競琢磨俱報稻粱各施鳴吠于時歲次鵠火月躔夷則驂駕務隳靈光意靜前臨
竹沼却倚桂巖泉石瑩仁智之心烟霞發文彩之致賓僚霧集教義風靡乃討論羣藝商略衆書以爲小
學之家尤多舛雜雖復周禮漢律務在貫通而巧說邪辭遞生同異且文訛篆隸音謬楚夏三蒼急就之
流微存章句說文字林之屬唯別體形至於尋聲推韻良爲疑混酌古會今未臻功要未有李登聲類
解韻集始判清濁纔分宮羽而全無引據過傷淺局詩賦所須卒難爲用遂躬紆睿旨標摘是非撮舉宏
綱裁斷篇部總會舊轍創立新意聲別相從卽隨注釋詳之詁訓證以經史備包騷雅博牽子集汗簡云
畢題爲韻纂凡三十卷勒成一家方可藏彼名山副諸石室見羣玉之爲淺鄙懸金之不定爰命末學製
其都序微業術已寡思理彌殫心若死灰文慙生氣徒以犬馬識養飛走懷仁敢執顛沛之辭遂操狂簡
之筆而齊魯富經學楚鄭多良士西河之彥幸不誚於索居東里之才請能加於潤色未幾俊薨晉王廣
復引爲揚州博士令與諸儒撰江都集禮一部復令徽作序曰禮之爲用至矣大與天地同節明與日月
齊照源開三本體合四端巢居穴處之前卽萌其理龜文鳥迹以後稍顯其事雖情存簡易意非玉帛而
夏造殷因可得知也至如秩宗三禮之職司徒五禮之官邦國以和人神惟敬道德仁義非此莫成進退
俯仰去茲安適若璽印塗猶防止水豈直譬彼耕耨均斯粉澤而已哉自世屬坑焚時移漢魏叔孫通之

碩解高堂隆之博識專門者霧集制作者風馳節文頗備枝條互起皇帝負屨垂旒辨方正位纂勛華之
麻象綴文武之憲章車書之所會通觸境斯應雲雨之所霑潤無思不遑東探石簣之符西蠶羽陵之策
鳴鑿太室偃伯靈臺樂備五常禮兼八代上柱國太尉揚州總管晉王握珪璋之寶履神明之德隆化讚
傑藏用顯仁地居周邵業冠河楚允文允武多才多藝戎衣而籠關塞朝服而掃江湖收杞梓之才闢康
莊之館加以佃漁六學網羅百氏繼稷下之絕軌弘泗上之淪風蹟無隱而不採事有難而必綜至於采
標綠錯華垂丹篆刑名長短儒墨是非書圃翰林之域理窟談叢之內謁者所求之餘侍醫所校之逸莫
不澄涇辨渭拾珠棄蚌以爲質文遞改損益不同明堂曲臺之記南宮東觀之說鄭王徐賀之答崔譙何
庾之論簡牒雖盈菁華蓋鮮乃以宣條暇日聽訟餘晨娛情窺寶之鄉凝相觀濤之岸總括油素躬披細
繆爰燕刈楚振領提綱去其繁雜撮其指要勒成一家名曰江都集禮凡十二帙一百二十卷取方月數
用比星周軍國之義存焉人倫之紀備矣昔者龜蒙令后睢渙名藩誠復出警入蹕擬乘輿之制度建輶
載旅用天子之禮樂求諸述作未聞茲典方可韜之頻水副彼名山見刻石之非工嘆懸金之已陋是知
沛王通論不獨擅於前脩靈朔新書更追慙於往冊徽幸棲仁岳忝遊聖海謬承恩獎敢叙該博之致云
煬帝嗣位詔徽與著作佐郎陸從典太常博士褚亮歐陽詢等助越公楊素撰魏書會素薨而止授京兆

郡博士楊玄感兄弟甚重之數相來往及玄感敗凡交關多罹其患微以玄感故人爲帝所不悅有司希旨出微爲西海郡威定縣主簿意甚不平行至隴西發病卒

杜正玄
弟正藏

杜正玄字慎微其先本京兆人八世祖曼爲石趙從事中郎因家於鄴自曼至正玄世以文學相授正玄尤聰敏博涉多通兄弟數人俱未弱冠並以文學才辯籍甚三河之間開皇末舉秀才尙書試方略正玄應對如響下筆成章僕射楊素負才傲物正玄抗辭酬對無所屈撓素甚不悅久之會林邑獻白鸚鵡素促召正玄使者相望及至卽令作賦正玄倉卒之際援筆立成素見文不加點始異之因令更擬諸雜文筆十餘條又皆立成而辭理華贍素乃嘆曰此真秀才吾不及也授晉王行參軍轉豫章王記室卒官弟正藏

杜正藏字爲善尤好學善屬文弱冠舉秀才授純州行參軍歷下邑正大業中學業該通應詔舉秀才兄弟三人俱以文章一時詣闕論者榮之著碑誄銘頌詩賦百餘篇又著文章體式大爲後進所寶時人號爲文軌乃至海外高麗百濟亦共傳習稱爲杜家新書

常得志